

Dumonda Locher Benguerel concernent l'augment da la violenza a chasa en il Grischun

Deplorablament fa la violenza a chasa en Svizra anc adina part dal mintgadi. Quai mussan las suandantas cifras las pli novas er per il chantun Grischun:

- Tenor la statistica criminala da la polizia chantunala dal Grischun èn vegnids denunziads l'onn 2016 259 cas da violenza a chasa en il rom da relaziuns da famiglia, quai correspunda a tschintg delicts per emna. Envers l'onn 2015 è quai in augment da 75 cas.

- Quest augment sa reflectescha er en la Chasa per dunnas dal Grischun. Uschia ha quella acceptà l'onn passà uschè bleras persunas sco anc mai.

- En il quint annual 2016 pon ins leger, ch'il dumber da las victimas da violenza (a chasa) è s'augmentà fermamain envers l'onn precedent, quai per 13,5 % (73 cas).

I vala da resguardar che las cifras registradas èn mo il piz da la muntogna da glatsch e ch'il dumber zuppà è fitg aut.

Il cussegl naziunal ha acceptà ils 31 da matg 2017 – sco segunda chombra – la ratificaziun da la convenziun dal cussegl da l'Europa davart la prevenziun e davart il cumbat cunter violenza envers dunnas, uffants, umens e cunter violenza a chasa. L'uschenumnada convenziun d'Istanbul oblighescha ils stadis contractants da prevegnir, da cumbatter e da perseguitar violenza envers dunnas e violenza a chasa. Plinavant vegnan ils stadis contractants obligads da prevoir mesiras preventivas, sco programs da sensibilisaziun. Cun il consentiment a la ratificaziun metta il parlament federal in cler signal cunter violenza a chasa e cunter violenza envers dunnas.

Sut l'aspect da l'augment dal dumber da violenza a chasa en il Grischun e sut l'aspect da la ratificaziun da la convenziun d'Istanbul sa tschentan las suandantas dumondas:

1. Tgenins èn – tenor la regenza – ils motivs per l'augment dals cas da violenza a chasa en il Grischun?
2. Vegn la regenza – sin fundament da las cifras las pli novas – a prender mesiras per cumbatter cunter l'augment da violenza a chasa? Sche gea, tgeninas?
3. L'onn 2003 è vegnì lantschà il project d'intervenziun grischun cunter violenza a chasa. En tge structurazions è el vegnì transferì l'onn 2014? Tge post spezialisà è vegnì incumbensà da cuntinuar cun quest project e tge incumbensas ha quest post ademplì dapi lura?
4. Tge consequenzas vegn la ratificaziun da la convenziun d'Istanbul ad avair per il Grischun? Ademplescha il Grischun las premissas da questa convenziun?
5. È la Chasa per dunnas dal Grischun segirada a lunga vista sco purschida da cussegliaziun nunbirocratica e sco alloschi da protecciun?

Cuira, ils 13 da zercladur 2017

Locher Benguerel, Bucher-Brini, Florin-Caluori, Atanes, Baselgia-Brunner, Blumenthal, Bondolfi, Brandenburger, Cahenzli-Philipp, Casty, Casutt-Derungs, Cavegn, Caviezel (Cuira), Danuser, Darms-Landolt, Della Vedova, Deplazes, Dermont, Dosch, Fasani, Gartmann-Albin, Hitz-Rusch, Holzinger-Loretz, Jaag, Jeker, Joos, Kollegger, Kunfermann, Kunz (Cuira), Lamprecht, Lorez-Meuli, Mani-Heldstab, Märchy-Caduff, Michael (Donat), Monigatti, Müller, Nay, Niederer, Noi-Togni, Papa, Pedrini, Perl, Peyer, Pfenninger, Pult, Salis, Steck-Rauch, Stiffler (Cuira), Tenchio, Thomann-Frank, Thöny, Tomaschett-Berther (Trun), Troncana-Sauer, Vetsch (Pragg-Jenaz), von Ballmoos, Weber, Berther (Segnas), Gassmann, Geisseler Severin, Pfister, Plattner Gerber, Wellig